

croyans qu'il s'arresteroit en la maison qu'on y faisoit bastir: Nous luy promettions du secours pour l'aider à defricher la terre; il nous prestoit assez l'oreille, escoutoit volontiers, notamment ce qui concerne l'autre vie, mais il n'auoit point de paroles pour nous répōdre: En fin nous luy auons demandé depuis son Baptesme d'où venoit qu'il faisoit tant le retif; peut-estre, luy difions-nous, que tu croyois que nous estions des menteurs; non pas cela, répondit-il, ie n'ay point douté de vos paroles ny de vos promesses, mais ie vous diray franchement, que ie craignois que mes gens me tinffent pour François; c'est pourquoy ie ne voulois point quitter les façons de faire de ma nation pour embrasser les vostres, quoy que [109] ie les iugeasse meilleures. Ie ne laissois point de croire dans mon ame ce que vous enseigniez de celuy qui a tout fait. Il faut auoier qu'il a donné souuent des preuues de sa foy. Deuant qu'il fust Chrestien, il apportoit luy-mesme ses enfans en la Chappelle pour estre baptizez; que s'ils estoient trop malades, il nous appelloit en sa cabane, il a procuré le mesme bien à l'une de ses femmes, car il en auoit deux: Il a veu iusques à quatre de ses enfans mourir Chrestiens deuant ses yeux: Il entendoit les blasphemés de ses Compatriotes contre ces eaux sacrées, leur attribuant la cause de leur mort: & nonobstant tout cela, pas vn des siens n'est passé en l'autre vie sans estre laué du Sang de IESVS-CHRIST. Vne sienne fille aagée d'environ dix-huict à vingt ans, pressée d'une forte maladie qui luy arrachoit la vie par violence, ne vouloit en aucune façon oïir parler du Baptesme, s'imaginant que ceste medecine sacrée de nos ames n'ayant point guery les corps de ses freres, luy feroit fatale & nuisible; son